



REPUBLIKA E SHQIPËRISË  
KËSHILLI I LARTË GJYQËSOR

Nr. \_\_\_\_\_ Prot.

Tiranë, më \_\_\_\_\_.\_\_\_\_.2023

**VENDIM**

**Nr. 137, datë 28.03.2023**

**PËR**

**FILLIMIN E FUNKSIONIMIT TË GJYKATËS SË SHKALLËS SË PARË TË  
JURIDIKSIONIT TË PËRGJITHSHËM TIRANË**

Këshilli i Lartë Gjyqësor, mbështetur në nenet 135, pika 1, 147, pika 1, 147/a, shkronja “ë” të Kushtetutës së Republikës së Shqipërisë, nenet 13 dhe 66 të Ligjit nr.98/2016 “Për organizimin e pushtetit gjyqësor në Republikën e Shqipërisë” i ndryshuar, nenin 44 të Ligjit nr. 96/2016 “Për statusin e gjyqtarëve dhe prokurorëve në Republikën e Shqipërisë”, i ndryshuar, si dhe nenin 61, paragrafi 2, shkronja “ë” të Ligjit nr.115/2016 “Për organet e qeverisjes së sistemit të drejtësisë”, i ndryshuar, me propozim të Komisionit të Planifikimit Strategjik, Administrimit dhe Buxhetit,

**V E N D O S I :**

**SEKSIONI I  
DISPOZITA TË PËRGJITHSHME**

Neni 1

Emërtimi dhe selia

1. Gjykata e Rrethit Gjyqësor Tiranë emërtohet Gjykata e Shkallës së Parë e Juridiksionit të Përgjithshëm Tiranë.
2. Gjykata e Shkallës së Parë të Juridiksionit e Përgjithshëm Tiranë fillon funksionimin më datë 01.05.2023.
3. Selia e Gjykatës së Shkallës së Parë të Juridiksionit të Përgjithshëm Tiranë është në Tiranë, në adresën Bulevardi “Gjergj Fishta”.
4. Gjykata e Rrethit Gjyqësor Krujë, ndërpret veprimtarinë më datë 30.04.2023.

**SEKSIONI II**  
**ORGANIZIMI DHE FUNKSIONIMI I GJYKATËS SË SHKALLËS SË PARË TË**  
**JURIDIKSIONIT TË PËRGJITHSHËM TIRANË**

Neni 2

Gjyqtarët e Gjykatës së Shkallës së Parë të Juridiksionit të Përgjithshëm Tiranë

1. Numri i gjyqtarëve të Gjykatës së Shkallës së Parë të Juridiksionit të Përgjithshëm Tiranë përcaktohet me akt të veçantë të Këshillit të Lartë Gjyqësor.
2. Gjyqtari i emëruar/caktuar në një pozicion të përhershëm/të përkohshëm në Gjykatën e Rrethit Gjyqësor Tiranë qëndron në pozicion në strukturën e Gjykatës së Shkallës së Parë të Juridiksionit të Përgjithshëm Tiranë.
3. Gjyqtari i emëruar/caktuar në një pozicion të përhershëm në Gjykatën e Rrethit Gjyqësor Krujë, të cilit i suprimohet pozicioni për shkak të riorganizimit gjyqësor, transferohet në pozicion të përhershëm në strukturën e Gjykatës së Shkallës së Parë të Juridiksionit të Përgjithshëm Tiranë.
4. Pozicionet e shpallura për lëvizje paralele në Gjykatën e Rrethit Gjyqësor Tiranë, për të cilat në datën 1.05.2023 nuk ka përfunduar ende procedura e lëvizjes paralele, konsiderohen pozicione të lira të përhershme në strukturën e Gjykatës së Shkallës së Parë të Juridiksionit të Përgjithshëm Tiranë. Këshilli i Lartë Gjyqësor pas datës 1.05.2023 vijon procedurat e papërfunduara për llogari të Gjykatës së Shkallës së Parë të Juridiksionit të Përgjithshëm Tiranë.

**SEKSIONI III**  
**ORGANET E ADMINISTRIMIT GJYQËSOR**

Neni 3

Organet e administrimit gjyqësor

1. Kryetari i Gjykatës së Shkallës së Parë të Juridiksionit të Përgjithshëm Tiranë zgjidhet nga Këshilli i Lartë Gjyqësor sipas përcaktimit të ligjit “Për statusin e gjyqtarëve dhe prokurorëve në Republikën e Shqipërisë”, i ndryshuar.
2. Në mungesë të kryetarit të Gjykatës së Shkallës së Parë të Juridiksionit të Përgjithshëm Tiranë, kompetencat ushtrohen nga zëvendëskryetari i gjykatës deri në zgjedhjen e kryetarit.
3. Zëvendëskryetari në detyrë i Gjykatës së Rrethit Gjyqësor Tiranë qëndron në detyrën e zëvendëskryetarit të Gjykatës së Shkallës së Parë të Juridiksionit të Përgjithshëm Tiranë deri në përfundim të mandatit, me përjashtim të rasteve kur ka shkaqe për mbarimin e statusit të magjistratit.
4. Kancelari në detyrë i Gjykatës së Rrethit Gjyqësor Tiranë qëndron në detyrën e kancelarit të Gjykatës së Shkallës së Parë të Juridiksionit të Përgjithshëm Tiranë deri në emërimin e kancelarit të ri të kësaj gjykate, sipas ligjit.

5. Këshilli i Gjykatës së Shkallës së Parë të Juridiksionit të Përgjithshëm Tiranë, deri në zgjedhjen e kryetarit dhe emërimin e kancelarit, nuk ndryshon përbërjen aktuale të tij.

#### **SEKSIONI IV**

#### **ADMINISTRIMI I BRENDSHËM GJYQËSOR**

##### Neni 4

##### Administrata gjyqësore

1. Administrata gjyqësore e Gjykatës së Rrethit Gjyqësor Tiranë, e përbërë nga punonjësit që ushtrojnë shërbimet gjyqësore, administrative dhe mbështetëse sipas përcaktimit të ligjit, vijon të ushtrojë veprimtarinë pranë Gjykatës së Shkallës së Parë të Juridiksionit të Përgjithshëm Tiranë dhe nuk i nënshtrohet procesit të ristrukturimit.
2. Administrata gjyqësore e Gjykatës së Rrethit Gjyqësor Krujë i nënshtrohet procesit të ristrukturimit.
3. Këshilli i Lartë Gjyqësor përcakton me akt të veçantë krijimin dhe funksionimin e Komisionit të Ristrukturimit, sipas ligjit.
4. Rregullat standarde për strukturën dhe organika e administratës gjyqësore të Gjykatës së Shkallës së Parë të Juridiksionit të Përgjithshëm Tiranë, përcaktohen me akt të veçantë të Këshillit të Lartë Gjyqësor.

#### **SEKSIONI V**

#### **TRANSFERIMI DHE MENAXHIMI I ÇËSHTJEVE GJYQËSORE**

##### Neni 5

##### Transferimi i çështjeve gjyqësore

1. Çështjet gjyqësore të regjistruara në gjykatat e rretheve gjyqësore Tiranë dhe Krujë deri në datën 30.04.2023, por që nuk kanë përfunduar sipas ligjit, transferohen në Gjykatën e Shkallës së Parë të Juridiksionit të Përgjithshëm Tiranë.
2. Çështjet gjyqësore që transferohen në Gjykatën e Shkallës së Parë të Juridiksionit të Përgjithshëm Tiranë, regjistrohen në regjistrat manualë dhe sistemin elektronik të menaxhimit të çështjeve Ark-IT.
3. Për zbatimin e pikës 1 dhe 2 të këtij neni ngarkohet Departamenti i Administrimit të Gjykatave dhe Teknologjisë së Informacionit pranë Këshillit të Lartë Gjyqësor.

Neni 6  
Menaxhimi i çështjeve gjyqësore

Çështjet gjyqësore të transferuara në Gjykatën e Shkallës së Parë të Juridiksionit të Përgjithshëm Tiranë nuk i nënshtrohen rindarjes me short. Këto çështje vijojnë të shqyrtohen nga i njëjti trup gjykues.

**SEKSIONI VI**  
**PËRGJEGJËSITË BUXHETORE DHE FINANCIARE**

Neni 7  
Përgjegjësitë buxhetore dhe financiare

Gjykata e Shkallës së Parë e Juridiksionit të Përgjithshëm Tiranë, brenda muajit maj 2023, mbështetur në legjislacionin në fuqi, përmbush të gjitha detyrimet dhe përgjegjësitë që rrjedhin nga mbyllja më datë 30.04.2023 e aktivitetit ekonomiko-financiar të Gjykatës së Rrethit Gjyqësor Krujë.

Neni 8  
Hyrja në fuqi e vendimit

Ky vendim hyn në fuqi me botimin në Fletoren Zyrtare.

**PËR KËSHILLIN E LARTË GJYQËSOR**